

671.1237
078
110

東光縣志

東光縣志卷十二 光緒十二年重修

雜稽志下

陵墓

唐蘇頌作壩上記褚遂良作鬼冢志猶紀異也若周禮墓大夫掌凡邦墓之地域爲之圖此則後世志陵墓之嚆矢矣况其勲業德望昭簡冊而繫人心者哉東邑所祠三賢今其墓皆失考殊爲缺憾竊查城東南二十里冢孫家莊北有古冢七座俗稱王墳因思邑人之稱王者惟唐袁公恕已進封南陽郡王所謂王墳或貞烈兆域在此間耶姑錄存疑其他諸墓皆

祀於鄉賢者餘不多及志陵墓

漢

竇太后父安成侯墓 在城西北三十里桑家莊南漢書地理志所云竇氏青山卽此

古冢一座 在城南十五里小屯南俗稱王墳

古冢二座 在城北十二里趙竇家莊南

古冢七座 在城東南二十里孫家莊北其土最爲膏腴農人耕種多拾得古錢其文盡五銖大要漢時冢也俗稱王墳

古冢一座 在城南二十里李快手莊迤北俗稱太子

墳

古冢一座 在土山太子窪俗名太子墳

唐

鄉賢袁恕己墓 失考

宋

王昭遠墓 通志云在縣境今無考

按昭遠乃阜城王繼升之子所謂鐵山者是也

鄉賢劉摯墓 在城南十二里 通志府志同 今失故址

鄉賢張預墓 失考

明

鄉賢廖紀墓 在馬頭鎮西距城四里許

諭祭碑文卿質醕樸操履方嚴早掇賢科厯官選
部奉常超擢譯教實司卿佐晉遷賢勞茂積繼陞
司馬參贊留都遂典銓曹權衡人物忠勤體國南
北馳聲宮保載加益隆倚任懇求休退特賜優閑
宜享安榮遽聞哀訃追惟往勳實軫朕懷爰勅有
司爲營葬祭復加美諡用慰卿靈冥漠有知尙其
歆服又卿以耆德舊臣夙著勞績比求致仕遽
隔幽冥窀穸倏臨益增悼惜載頒諭祭用篤始終
九原有知庶其歆服

鄉賢馬汝松墓 在城南八里馬家橋西

鄉賢王嘉言墓 在馬頭鎮西北距城三里許

薊門成憲撰墓誌萬厯壬寅秋七月某日奉政大
夫尙寶司卿王公卒於家越明年癸卯公四子茂
槐持其兄植槐所爲公狀謁不佞憲乞誌銘不佞
與公同舉於鄉同舉於南宮又同讀中秘書誌公

銘公真不佞事因憶往肄館下同饌蓋五人焉一
今少保閣學沈公仲化一通參楊公祖堯一宗伯
學士何公啟圖一公一不佞也通參年五旬卒余
哭之宗伯年六旬卒余又哭之今又哭公則公年
已七旬稱古稀矣公諱嘉言字孔彰別號慎齋世
爲東光人其先有諱貴者孤貧力耕自食貴生紳
紳生信信生畿代有隱德畿卽公父也邑廩生以
公貴加贈尙寶司卿配梁氏加封太宜人有二子
長嘉賓德府典儀正次公公生而哲秀性穎慧異
凡兒四歲贈公口授干文輒成誦甫逾齠能屬對
贈公奇之謂太宜人曰大吾門者必此子也年十
六補博士弟子受尙書學使而峯阮公鑒賞其文
廩之邑亡何贈公卒公哀毀骨立太宜人諭之曰
人子當力圖不朽以顯其親何毀瘠爲公奉教葬
贈公以禮不事浮屠士大夫翕然稱之襄事後益
刻勵向學凡三歷寒暑而制科之業成嘉靖戊午
舉順天乙丑舉南宮奉軒對同進士出身以選入
翰林爲庶吉士太宜人聞之驟然喜復愀然以悲
曰嗟乎課兒者誰耶而不食其報也丁卯授浙江
道監察御史會莊皇帝踐祚恩贈贈公如其官母

梁妻李俱孺人公入西臺以風紀言責爲己任會
華亭與新鄭忤言路左袒華亭排擊紛起新鄭屢
疏求去上不允言者益衆公爲新鄭門人心不能
平而雅不欲爲私阿因上言大臣進退有禮今公
論旣未定宜聽其去以全國體他日論定召用未
晚公實爲新鄭解紛而詞頗傷直遂失座師懼曰
奈何操戈入我室也乾清坤甯兩宮鼎新上命公
監工作九閱月成賜白金文綺晉秩通政司參議
公力辭詔改尙寶司卿會建儲恩加贈贈公今官
加封母梁太宜人妻李宜人尋奉命冊封周藩於
餽遺一無所受事竣便道省覲奉觴上太宜人壽
太宜人喜曰今而後而父可光於幽吾亦可榮於
堂矣無何新鄭復相出公知揚之通州公至視民
如子噢咻拊循備至歲大祲捐俸倡賑閭右赴義
得粟五千煮粥食餓者瘟疫作復給醫藥百姓全
活者甚衆尤加意學校或以貧乏請給之不厭問
爲貧生婚娶居通年餘遷同知夔州府府治在蜀
萬山之中稱疲郡公履任數月聲華藉甚有門役
王庭問者能屬對諭令讀書後游庠爲鄉貢士萬
厯改元入司諫閱卷得陳汝學萬選陳成癸未進

士時稱為知人會郡守朝京署府事凡六閱月得
贖鍰千金公分毫無所取雲陽蘇氏夫醉而死坐
蘇極刑更二三郡守不白公察其冤力請當道釋
之又嘗視象瀘州會九絲蠻亂調播州宣慰司兵
討之所遇殘害守令莫敢誰何將至瀘瀘人大恐
公下令曰吾在何恐為偵使至郊勞之且贈之詩
曰君才宜佩呂虔刀英邁由來膽氣豪部曲也諸
雲鳥陣將軍久熟虎龍韜過都電掣青驄馬映日
風吹紅錦袍共說阿蒙嚴號令民間不使犯秋毫
宣慰喜於瀘果無犯三年陞南京戶部湖廣司郎
中未任改禮部儀制司公居儀曹事一切治辦考
最封繼妻宮氏亦宜人因忤尚書潘新昌出知山
東濮州公宦情素薄及載起載蹟意益倦太宜人
勉之行抵任視事加意撫恤一如治通時民有貧
不能耕者買牛給之州之重役莫過於走遞馬公
復買馬給之民困以蘇比公解組則未嘗驅一牛
一馬來鄉井也其加意學校一如治通時每立社
課文品其高下於是士若桑正衍周杞田汝成王
九皋應震李喬年輩鶴騰者皆先後舉於鄉初公
游通游夔皆奉太宜人行至是春秋高不復與偕

公居濮二載北望慈幃作瞻雲賦以寫其思及典
儀公卒遂上書陳情詔許終養公歸而太宜人尙
善匙箸奉養十年己丑春太宜人忽不豫公日夜
侍湯藥衣不解帶目不交睫者再閱月及太宜人
卒而公功名之心益灰矣直指屢薦不起遂於所
居之北建一樓以娛老每課子明農之暇或邀舊
友或過契家引滿呼盧殆若義皇胥庭之世之人
也優游林泉通計二十三年歲壬寅頭忽痛公曰
吾素無恙今病在首苦甚吾其休乎已而曰人患
行己不臧耳吾自服官以迄今日無一事不可對
人言與天知雖死何憾迺以七月十七日瞑焉以
逝距其生嘉靖癸巳十月初七日得壽七十子男
六植槐漑槐培槐茂槐愛槐廕槐孫男十一元衡
元爽元繼元紹元婁元承元俊元健元選元舉元
蘭公天性孝友雖年至頽白於太宜人怒輒長跪
受責歲中於家廟凡四薦春秋季月徧邀同宗展
墓展畢而燕而親親之禮行焉典義公乏嗣公推
子繼之尤好施予萬厯壬辰同年周成南公乘扁
舟詣京補官至東光之小龍灣觸運艘破損糧周
泣訴於公公曰吾雖貧也可坐視乎傾囊得五十

金又轉懇親故得二百金代償其糧他如中表閭
左平日尤多所明恤及聞公訃無不隕涕者所刻
有錦繡論鈔錦繡策鈔表學規範行於世所著有
四書講義書經講義慎齋文集藏於家公子植槐
輦將以今年十月二十五日奉公與宜人合葬於
祖塋之次乃為之銘銘曰以文學奮以政事庸以
上士始以下大夫終橫天之羽安受龍華亭新鄭
徙交攻方州僻郡拙可容隨車甘澍蘇疲癯時吐
厥緒開顓蒙誰則尼之俾弗通公退為孝進為忠
神之相之福壽隆雞鳴之助功與同子孫繩繩瀛
之東云不可知彼蒼
穹亦云可必彼蒼穹

鄉賢莊蒞民墓 在城南十八里連鎮運河堤內

鄉賢馬允登墓 在城北五里鄭莊東

鄉賢霍德行墓 在城西北十里霍家新莊西

國朝

夏方縣志 卷之二
鄉賢馬廷贊墓 在城南六里柴王莊南

鄉賢馬之駿墓 在城北五里鄭莊東

鄉賢馬廷宣墓 在城南六里柴王莊南

寺觀

語云攻乎異端斯害也已或曰攻擊而去之也已止也言攻擊異端而去之斯其害可已止也若是乎釋老之不宜章教明矣然自法顯記洛陽伽藍而酈注水經亦徵佛國惑人聽聞故綱鑑於造像立寺必書以示戒焉是亦紫陽之微意也夫志寺觀

實性寺

在城西北弓高城唐貞觀三年敕建碑為調露初所立久已廢圯

畿輔通志曰實性寺在縣西弓高廢縣按府志稱弓高不為縣者七八百載所為寺像已杳莫問唐張文成撰弓高縣實性寺什迦像碑記詳夫元天北列運斗極於璇樞大地東傾鎮江河於玉岳晝夜則晦明無定義舒為朝夕之資動靜則虧缺有時乾坤非久長之器豈如湛然常住大雄包混

沌之源寂爾無生正覺出氤氲之表故能使九十
 六道紀菩提之一門三十六天貫須彌之四頂振
 毘藍而吹大塊運俗祇於埏埴之前揚智炬而爍
 洪鑪置賢劫於陶鈞之上其去也後天而滅故現
 滅而歸無其來也先地而生故因生而示有青霄
 帝座降靈氣於中胎白淨王宮孕神資於右脇蓮
 乘七步樹下六年薦玉象於祥符啟金人之瑞夢
 影流中國大地由其震動光入太微恆星爲之不
 見法王之應迹也妙覺常身本無顏色至人垂教
 遂有形儀開滿月之奇姿韞中天之異相蓮開青
 目毫光照於四天花豔丹脣頂彩周於十地法王
 之寶相也具一切智通萬物名往來不窮之謂聖
 陰陽莫測之謂神持惠燈而耀長夜揚法舸而救
 迷津爲塵品之醫王作羣生之慈父法王之至仁
 也法忍智忍率難忍以皆空無心卽心總羣心而
 俱攝珊瑚江海一指測於波瀾琉璃日月二手分
 其晝夜目連持綫天地爲之頽綱舍利投鉢山石
 由其絕紐法王之神力也儒童毓秀闕里生歎鳳
 之君摩訶降迹苦縣誕猶龍之彥仲尼禮樂之標
 首抑至聖於迦維伯陽道經之真宗訪古皇於天

竺故知一乘妙旨超然居十翼之先天二諦微言邈
矣出三清之表法王之威德也率陀天上舍衛城
中百千妙界生於鳥翅之間十二音聲出於象牙
之表金繩百丈下照日宮珠網七重旁臨月殿萍
流地上化為池沼之形花散空中變作樓臺之影
法王之壯觀也佛中佛日天上天人金口振於西
方銀函泊乎東夏無能間細寫鼇極於波流有外
談空運迦維於宇宙合掌腹內思聞十善之音聲
舒翼殼中遙相四天之說法法王之仁化也高梯
直上包括太虛抽鍼旁役區分小有貫華之句光
如水上之蓮說偈之音皎若星中之月非有相而
非無相凡聖莫測其幽微空是色而色是空聖愚
不知其要妙法王之教化也法身無像故因像以
宣功道本無言以因言而示教塵俗不可久處故
厭世而歸空真如不以道標故凝神而降迹吾之
去也因辯無常吾之來也因談緣起時有所至河
海爲之編龍神有所歸叢林爲之變鶴從滅至滅
能通寂滅之因無生示生永入長生之地法王之
變化也由是八方迴向萬國依歸慧日被於三千
法雨流於百億周穆王之代聖教方融漢明帝之

時慈風漸扇年移晉宋運屬周隋蒼鵝出而天地
屯赤龍發而干戈起秦川涌血羅什不歸趙郡僵
屍圖徵永去西域馱經之路荆棘參天東郡畫像
之郊風塵撲地我高祖神堯皇帝旁迴地軸蹴崑
崙以西傾太宗文武大聖皇帝仰握乾符掃櫟槍
而南滅消平嶽瀆舒卷風雲芟毒樹而建祇園拔
邪山而開福地實性寺則貞觀三年奉敕之所建
也平原控趙渤海臨齊上參畢昂之星下瞰衡漳
之地浦稱駿瀆馬頰太史之遺蹤地號弓高龍額
將軍之舊業爰於此地迴構乾堂興八會之香臺
闕三休之妙觀龔遂解繩之邑寶綫爭施曹丕沈
李之郊天花競落羅宮映水枕藕闕於黃河魚梵
吟風接蜃樓於滄海實棲神之秘宅毓慶之神區
者哉寺主久依定水早庇禪林功濟有緣業優無
學塵機不染宏上善於慈心勝果爭攀察中乘於
慧眼非色非相凝神究竟之端無我無人高蹈苦
空之外上乘某等並尋鷲嶺訪道雞園歸誠甘露
之門自得醍醐之性鵝珠護戒標苦節於堅林龍
鏡澂空照真歸於靜域以爲修身者福福遂則殃
銷堅善者功功施則緣發旁求大匠廣召山虞粵

儀鳳二年移寶堂於寺內去舊處三百餘步設奇
功於地道神妙無方窮逸思於天關靈機不測魚
鱗翠瓦逐層閣而舟移雁齒青階帶崇基而轂轉
虹梁曜日煥若神行鯨棟凝煙故非人力寶階星
動似忉利之飛來紺殿雲浮同化城之涌出豈非
威神自在不可思議者哉於寶堂內敬畫什迦尊
像一鋪鎔金範素寫牘圖青斲象浦之靈珠珠龍
泉之羽壁鮫人織水競送霜縑蠶客抽絲爭投雪
綫七重交映百寶莊嚴實相端凝粹容圓備蜂王
獻蜜紛飛紫紺之樓龍女持花出入珊瑚之殿諸
天獻果芙蓉生寶座之前居士焚香柏葉起金鑑
之上千軀聖像據六地而揚音八部神龍下三天
而奏樂斯乃立功幽贊故無德而稱焉調露之初
邊烽屢警七重黑暈萬里黃沙旄頭干太白之精
素髮拒中台之翠鄉人等九州令族四海良家提
龍劍而星馳撮犀渠而電激爲鵬爲鸚輕飛鴻塞
之前如龍如貌迴嘯狼居之表陰山霧廓瀚海波
清憑慧力而服魔軍持廟算而推孺子共甲宏鎮
植此豐碑記歷代而長存惟令名之不朽奉爲高
宗大帝星珠斂耀霓斗潛輝御鸞鳳於金輿遂攀

龍於鼎嶠媧皇誕裔姬妣降禎斷鼇立極之神功
乘龍御天之業疑情三昧早慧六通坐蘭坂而
虔誠仰茨山而展慶使持節滄州諸軍事滄州刺
史李公烏喙殊姿龜文異相賈琮出刺下車而肅
百城韓壽閒居閉閣而綏千里長史北平公麗士
元之展足終非百里之才王休徵之佩刀實有三
台之望朝士大夫行弓高縣令晉居嘉禾獻瑞門
傳翠葉之風鬯草襲勳業踐雕弓之錫橫綺琴於
膝上翠翟朝駟攬明鏡於懷中青鸞曉集丞太原
王愿主簿隴西李灌尉河東衛神暹常山張行昇
等並地鄰鄒魯境接燕齊羊車映玉煥鼎氣於睢
川鵲印口口鬱靈符於寶軸驥從東道方申逐日
之功鵬舉北溟皆戢摩霄之翼鄉望某等並俗富
詩書家豐禮樂海隅鷗狎猶存射雉之規河朔鷹
揚仍帶爽鳩之氣雋不疑之故里氣調魁梧石神
容之舊墟英靈俊傑德由名顯功以頌冥非筆無
以申其功非言無以敘其德旁求翠琰遠播鴻徽
刻龍首於銀鉤鑿龜文於玉版蓬萊之水三尺孤
標碣館之前扶桑之日再中獨立金臺之上俾夫
天銷劫石瓊文刻而無窮地人微塵寶字書而不